



STINAPA TA INFORMA

E PRENDA PRESIOSO
I KARCHI DI TELEFON

Roy Kort ta papia di e naturalesa boneriano i mundial manera su prendanan presioso den su pakus Bamali den Kaya Grandi. Ku amor i delikadesa. Un 'yu di Kòrsou' di mayornan surnameño, el a bai Hulanda ku 16 aña pa sigui studia. Su spesialisashon ta maneho di restaurant i hotèl. El a traha pa diferente aña den e sektor aki na Hulanda. Su pakus tabata eksistí kaba, di 1989 te 1997. Den e último aña el a disidí di bai bèk Hulanda. Na 2006 el a establese su mes atrobe na Bonaire i a efektua un re-apertura di su pakus Bamali. Aktualmente 75% di su klientela ta turista. Hamas e lo benta un pròp di papel of algu sushi abou. Un biaha e la keda hasta 20 minüt ku un pròp di papel den su man pasobra no tabata tin un bari di sushi. Poko dia ei mi a mira ku un persona a tira un karch'i telefon abou. Mesora mi a hala su atenshon i sin diskushon el a kue e karchi for di abou". Roy ta konta. Sí, Roy Kort ta masha kouteloso ku medio ambiente i naturalesa en general. I ku su yu muhé na Hulanda, ku ta studiando siensianan di tera, e ta hiba sèmpèr kombersashonnan largu na telefon tokante medio ambiente i naturalesa. "Naturalesa mester ta mas limpi posibel" ta un di su ekspreshonnan fiho. E ta kontra ku Estádus Unídos no ta duna balor na e 'Akuerdo di Kioto'. E tin miedu di e situashon di e eis di e dos polonan ku ta smèlt. "E balanse ta bayendo pèrdí", segun Roy. E ta di opinion ku e naturalesa di Boneiru ta úniko. Na e parti nort e ta bunita bèrdè i ku seru. Na parti sùit e ta plat. Tambe e ta di opinion ku e boneriano ta konsiente pa tene Boneiru limpi. Pa loke ta konserní salú e ta spera ku hamas Boneiru haña indus-trianan ku lo susha e medio ambiente i asina afektá nos salú. Roy ta sigui splika ku e turista ta skohe, entre otro via internet, pa Boneiru riba otro paisnan òf islanan kontaminá. Ya ku entre otro e bida bou di laman ta asina bunita i limpi. "Turismo ta e entrada prinsipal pa e boneriano i nos ekonomia. Nos mester ta konsiente ku nos ta bendiendo nos solo i nos salu", Roy ta konkluí.

Skirbi pa Natalie Wanga.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru